

四庫全書

子部

欽定四庫全書

子部
冊府元龜卷二百十九

詳校官中書臣涂日煥

員外郎臣牛稔文覆勘

總校官庶吉士臣何思鈞

校對官學正臣李巖

謄錄監生臣于希賢

欽定四庫全書

冊府元龜卷一百十九

宋

王欽若等撰

僭偽部

總序

夫餘分爲閭既異夫居正之統王綱失紐或有乎僭命
之號斯蓋豪傑竊起以蓄乎覲觐強弱相凌分據乎土
守雖政令之自出非運序之所繫自魏武徙氏羌之種
雜處秦州晉氏之興厥類彌熾固徇名臣之議失於長

世之御亂華之暴乘間而作故劉淵以五部之衆起於離石石勒因晉陽之甲據乎襄國厲階之構乃繇於此而李特以流徙之繇奄宅益部而為蜀慕容廆因封建之舊保界遼碣而為燕羣雄競起宇內分裂河西之區張軌攸領因而稱制是稱前涼自此晉綱絕紐中原震蕩龜玉南徙遂荒江介其後符洪自薊州之廣川建三晉之號入寇關輔居長安而為秦李暠跨燉煌之地雄西夏而稱西涼慕容垂守中山之國蹈兩河而為後燕

乞伏國仁憑河湟之輿而為西秦呂光按酒泉之富而
為後涼姚萇乘符氏之業而為後秦馮跋踐昌黎之域
而為北燕秃髮烏孤負西平之阻而號南涼慕容德依
廣固之險而為南燕沮渠蒙遜保張掖而為北涼赫連
勃勃連朔方而稱夏凡十有六國焉俱僭大號各建正
朔或稱王爵並專誅賞傳世垂祚歷歲彌久而率多戎
虜之種或出氐羌之類始愆制馭終以疆大分宰諸夏
專制民命吞併相繼兵難不絕家國殊政百有餘年洎

宋祖之奮威及元魏之雄視芟夷掃蕩剪焉靡餘以至
唐室之季王度交喪禮樂征伐不出於朝廷山河疆理
遂分於土壤王審知跨據山海裂五郡而為閩王建憑
恃巖險包三川而為蜀楊行密宅淮海之壤擅魚鹽之
富建號而稱吳劉陟總百越之衆通珠貝之利開國而
為漢其後孟知祥因同光之難憑二劍之固僭尊名而
為後蜀李昇承吳人之業保重江之阻冒舊服而為唐
劉崇以漢室之亡托於宗胄仍厥位號保於太原而吳

唐二蜀繼守其宇七閩之亂厥土三分顯德之世尚餘
四國皇朝受命始平并絡旋殄五嶺後克江表三晉遺
孽再駕而服混一區內以致太平今自西晉之後洎唐
宋諸國論次其事類以為僭偽部凡三十七門

姓系 年號

姓系

夫胙土命氏事存於魯史別生分類義載於虞書蓋所
以辨族類而定嫌疑厚人倫而正宗祀也若夫桀黠之

流乘時射利割據州壤負阻山河或保聚方隅或饕餮竊
大號雖游魂假息寧亂紀於帝圖然瓜割豆分成編名
於博史源流所自祚裔攸存廣記備言既可徵於舊史
洽聞殫見將有助於方來爰用討論咸從編次

前涼張軌字士彥安定烏氏人漢常山景王耳十七世
孫也家世孝廉以儒學顯父溫為太官令軌晉惠帝時
為散騎常侍征西軍司馬永寧初出為護羌校尉涼州
刺史愍帝時進位司空固讓又拜侍中太尉涼州牧西

平公軌又固辭在州十三年表立子寔為世子卒年六十謚曰武公州人推寔攝父位寔字安遜愍帝因下策書授持節都督涼州諸軍事西中郎將涼州刺史領護羌校尉西平公在位六年為帳下閹沙所害私謚曰昭公元帝賜謚曰元子駿年幼弟茂攝事州人推茂為大都督太尉涼州牧茂不從但授使持節平西將軍涼州牧在位五年卒私謚曰成茂無子寔子駿嗣位駿字公庭在位二十二年卒私謚曰文公穆帝追謚曰忠成公

第二子重華嗣位自稱持節大都督太尉護羌校尉涼州牧西平公假涼王重華字泰臨在位十一年卒私謚曰昭公後改曰桓公穆帝賜謚曰敬烈子耀靈年十歲嗣事稱大司馬校尉刺史西平公在位一年為伯父祚所害私謚曰哀公祚字太伯自稱大都督大將軍涼州牧永和十年祚僭稱帝位篡立三年為其下張瓘等所殺立耀靈庶弟玄靚為大都督大將軍校尉涼州牧西平公玄靚字元安在位九年為駿少子天錫所害私謚

曰冲公孝武帝賜謚曰敬悼公天錫自號大將軍校尉

涼州牧西平公在位十三年降於苻堅

自軌為涼州至天錫凡九世七

十六年

西涼李暠字玄盛小字長生隴西成紀人漢前將軍廣之十六世孫也廣曾祖仲翔漢初為將軍討叛羌於素昌素昌即狄道也衆寡不敵死之仲翔子伯考奔喪因葬於狄道之東川遂家焉世為西州右姓高祖雍曾祖柔仕晉並歷位郡守祖弇仕張軌為武衛將軍家世亭

侯父晁幼有令名早卒遺腹生暉呂光末段業所署沙州刺史孟敏署暉效穀令敏卒護軍郭謙治中索僊等推玄盛為敦煌太守稱藩於業晉安帝隆安四年晉昌太守唐瑤推玄盛為大都督將軍涼公領秦涼二州牧護羌校尉在位十八年年六十四私謚曰武昭王子歆嗣歆字士業小字桐椎在位四年為沮渠蒙遜所滅弟敦煌太守恂為郡人宋承等所推為涼州刺史二年又為蒙遜所滅

始暉以安帝隆安四年
僭位凡三世二十四年

前趙劉淵字元海新興匈奴人冒頓之後也初漢高祖以宗女為公主以妻冒頓約為兄弟故其子孫遂冒姓劉氏後漢建武初烏珠留若鞮單于子右奧鞬日逐王比自立為南單于入居西河美稷今離石左國城即單于所徙庭也中平中單于羌渠使子於扶羅將兵助漢討平黃巾會羌渠為國人所殺於扶羅以其衆留漢自尊為單于屬董卓之亂寇掠太原河東屯於河內於扶羅死弟呼厨泉立以於扶羅子豹為左賢王即元海之

父也魏武分其衆為五部以豹為左部帥其餘部帥皆以劉氏為之太康中改置都尉左部居太原涇氏右部居祁南部居蒲子北部居新興中部居大陵劉氏雖分居五部然皆家於晉陽汾澗之濱豹生元海晉惠帝時為成都王穎所拜北單于永興元年僭稱漢王永嘉二年僭即皇帝位在位六年偽諡光文皇帝太子和立和字玄泰嗣偽位為弟聰所害聰字玄明一名載元海第四子以永嘉四年僭即皇帝位在位九年偽諡曰昭武

皇帝子粲嗣偽位粲字士光在位一年為靳準所殺元
海族子曜自長安赴難至於赤壁偽太保呼延宴等迎
立之以大興元年僭即皇帝位曜字永明在位十年為
石勒所殺

元海自懷帝永嘉四年僭位
至曜三世凡二十有七年

後趙石勒字世龍初名匍上黨武鄉羯人也其先匈奴別
部羌渠之胄祖邪奕於父周昌朱一名乞翼加並為部落
小率勒仕劉元海為平東大將軍封親漢王晉元帝大
興二年偽稱趙王成帝咸和五年僭號趙天王行皇帝

事尋僭即皇帝位在位十五年年六十子弘嗣偽位弘
字大雅在位二年年二十二為勒從子虎所廢尋殺之
虎字季龍稱居攝趙天王咸康三年僭稱大趙天王穆
帝永和五年僭即皇帝位六年季龍死在位十五年子
世立凡三十三日為兄遵所廢遵立一百八十三日為
冉閔所殺立石鑒鑒在位一百三日為閔所殺始勒以成帝咸
和三年僭立二主閔字永曾小字棘奴季龍之養孫也
四子凡二十三年父瞻字弘武本姓冉名良魏郡內黃人也其先漢黎陽

騎都督累世牙門勒破陳午獲瞻時年十二命季龍子之驍猛多力攻戰無前歷位左積射將軍西華侯閔幼而果銳季龍撫之如孫永和六年殺石鑿自立僭位二年為慕容雋所滅

前燕慕容廆字奕維瓌昌黎棘城鮮卑人也其先有熊氏之苗裔世居北夷邑於紫蒙之野號曰東胡其後與匈奴並盛控弦之士二十餘萬風俗官號與匈奴畧同秦漢之際為匈奴所敗分保鮮卑山因以為號曾祖莫

護跋魏初率其諸部入居遼西從宣帝伐公孫氏有功
拜率義王始建國於棘城之北時燕代多冠步搖冠莫
護跋見而好之乃斂髮襲冠諸部因呼之為步搖及後
音訛遂為慕容或云慕二儀之德繼三光之容遂以慕
容為氏祖木延左賢王父涉歸以全柳城之功進拜鮮
卑單于遷邑於遼東北於是漸慕諸夏之風矣虜晉武
帝太康中為鮮卑都督累轉遼東公持節都督幽州諸
軍事車騎將軍平州牧大單于在位四十九年年六十

五成帝遣使者策贈大將軍開府儀同三司謚曰襄第
三子皝嗣位皝字元真帝遣謁者拜征北大將軍平州
刺史大單于遼東公咸康三年僭即天王位在位十五
年年五十二第二子雋立雋字宣英穆帝永和五年僭
即燕王位八年僭即皇帝位在位十一年年四十二子
暉嗣偽位暉字景茂在位十一年為苻堅所滅

始虜
以武

帝太康六年稱公至
暉四世凡八十五年

前秦苻洪字廣世畧陽臨渭氏人也其先蓋有扈之苗

裔為西戎酋長始其家池中蒲生長五丈五節如竹形時咸謂之蒲家因為氏焉父懷歸部落小帥洪仕石季龍累有戰功封西平郡公穆帝永和六年季龍死洪自稱大將軍大單于三秦王改姓苻氏是年洪死年六十六子健嗣位去秦王之號七年僭稱天王大單于八年僭即皇帝位健字建業在位四年年三十九子生嗣偽位生字長生在位二年年二十三為苻堅所殺堅字永固一名文玉洪季子雄之子也以升平元年僭稱大

秦天王在位二十七年年四十八孝武太元十年為姚
萇所滅堅庶長子丕僭即皇帝位於晉陽丕字永叙在
位二年為慕容永所敗堅族孫登以太元十一年僭即
皇帝位登字文高在位九年年五十二為姚興所滅

始健

以永和七年僭立至
登五世凡四十四年

後秦姚弋仲南安赤亭羌人也其先有虞氏之苗裔禹
封舜少子於西戎世為羌酋其後燒當雄於洮罕之間
七世孫填虞漢中元末寇擾西州為楊虛侯馬武所敗

徙出塞虞九世孫遷那率種人內附漢朝嘉之假冠軍將軍西羌校尉歸順王處之於南安之赤亭那玄孫柯迴為魏鎮西將軍綏戎校尉西羌都督迴生弋仲仕石季龍為征西大將軍封西平郡公晉穆帝永和七年遣使降晉拜六夷大都督大單于封高陵郡公八年弋仲卒子襄嗣襄字景國升平元年為符堅所殺弟萇降堅萇字景茂堅以為揚武將軍累遷龍驤將軍孝武太元九年自稱大將軍大單于萬年秦王以太元十一年僭

即皇帝位在位八年年六十四長子興嗣自稱大將軍
明年僭即皇帝位興字子畧在位二十二年年五十一
長子泓嗣以義熙十一年僭即皇帝位泓字元子在位
二年年三十為晉所滅

始長以孝武太元九年僭
立至泓三世凡三十三年

後蜀李特字玄休巴西宕渠人其先廩君之苗裔也昔
武落鍾離山崩有石穴二所其一赤如丹一黑如漆有
人出於赤穴者名曰務相姓巴氏有出於黑穴者凡四
姓曰暉氏樊氏栢氏鄭氏五姓俱出皆爭為神於是相

與以劍刺穴屋能著者以為廩君四姓莫著而務相之
劍縣焉又以上為船彫畫之而浮水中曰若其船浮存
者以為廩君務相船又獨浮於是遂稱廩君乘其土船
將其徒卒當夷水而下至於鹽陽水神女子止廩君曰
此魚鹽所有地又廣大與君俱生可止無行廩君曰我
當為君求廩地不能止也鹽神夜從廩君宿旦輒去為飛
虫諸神皆從其飛蔽日晝昏廩君欲殺之不可別又不
知天地東西如此者十日廩君乃以青縷遺鹽神曰嬰

此即宜之與汝俱生弗宜將去汝鹽神受而嬰之廩君
立碣石之上望膺有青縷者跪而射之中鹽神鹽神死
羣神與俱飛者皆去天乃開朗廩君復乘土船下及夷
城夷城石岸曲泉水亦曲廩君望如穴狀歎曰我新從
穴中出今又入此奈何岸即為推廣三丈餘而階陞相
乘廩君登之岸上有平石方一丈長五尺廩君休其上
投策計筭皆著石焉因立城其旁而居之其後種類遂
繁秦并天下以為黔中郡薄賦斂之口歲出錢四十巴

人呼賦為賓因為賓人馬特父纂為東羌獵將特晉武帝元康中隨流人至蜀其後流人以特為主行鎮北大將軍惠帝大安元年自稱益州牧都督梁益二州諸軍事在位二年為晉益州刺史羅尚所殺特弟流自稱大將軍大都督益州牧流字元通年五十六死特子雄自稱大都督大將軍益州牧永興元年僭稱成都王又僭即帝位雄字仲雋在位三十年年六十一兄蕩之子班嗣偽位班字世文為李越所殺在位一年年四十七遂立

雄之子期字世運在位三年年二十五為李壽所廢自

縊死壽字武考特弟驥之子在位五年年四十四長子

勢嗣偽位勢字子仁在位五年為晉所滅

始特以惠帝
太安元年起

兵至勢六世
凡四十六年

後涼呂光字世明畧陽氐人也其先呂文和漢文帝初

自沛避難徙焉世為酋豪父婆樓佐命符堅官至太尉

光仕符堅為都督五門巴西諸軍事安西將軍西域校

尉堅為姚萇所害光於是自稱使持節侍中中外大都

督督隴右河西諸軍事大將軍領護匈奴中郎將涼州
牧酒泉公晉孝武太元十五年僭即三河王位二十一
年僭即天王位在位十年年六十嫡子紹嗣偽位為庶
長子纂所殺纂字永緒僭即天王位在位三年為呂起
所殺立光弟寶之子隆嗣偽位隆字永基為姚興所滅
始光以孝武太元十二年定涼州
十五年僭立至隆凡十有三載

後燕慕容垂字道明前燕慕容皝之第五子慕容雋時
封為吳王慕容暉為符堅所滅垂在堅朝歷位京兆尹

堅敗垂引兵至滎陽以晉孝武太元八年自稱大將軍
大都督燕王在位十三年年七十一子寶嗣寶字道祐
在位三年年四十四子盛嗣盛字道運在位三年年二
十九垂少子熙嗣熙字道文在位六年年二十三為寶
養子雲所弑雲字子雨祖父高和句驪之支庶自云高
陽氏之苗裔故以為高氏焉

始垂以孝武太元八年僭
立至熙四世凡二十四年

雲尋為幸臣離班姚仁所殺

西秦乞伏國仁隴西鮮卑人也昔有如弗斯出連叱

盧三部自漢北南出大陰山遇一巨蟲於路其狀若神龜大如陵阜乃殺馬而祭之祝曰若善神也便開路惡神也遂塞不通俄而不見乃有一小兒在馬時又有乞伏部有老父無子者請養為子衆咸許之老父欣然自以有所依憑字之曰紇干紇干者夏言依倚也年十歲驍勇善射彎弓五百斤四部服其雄武推為統主號之曰乞伏可汗託鐸莫何託鐸者言非神非人之稱也其後有祐鄰者即國仁五世祖也晉武帝泰始初率戶五

千遷於夏綠部衆稍盛鮮卑鹿結七萬餘落屯於高平川與祐鄰迭相攻擊鹿結敗南奔畧陽祐鄰盡并其衆因居高平川祐鄰死子結權立徙於牽屯結權死子利般立擊鮮卑吐賴於烏樹山討尉遲渴權於大非川收衆三萬餘落利般死弟祁埜立祁埜死利般子述延立討鮮卑莫侯於菟川大破之降其衆二萬餘落因居乳川以叔父軻埜為師傅委以國政斯引烏埜為左輔將軍鎮蔡園川出連高胡為右輔將軍鎮至便川叱盧般

胡為率義將軍鎮牽屯山迷延死子偁大寒立會石勒
滅劉曜懼而遷於麥田無孤山大寒死子司繁立始遷
於度堅山尋為符堅將王統所襲部眾叛降於統司繁
歎謂左右曰智不距敵德不撫眾劍騎未交而本根已
敗見眾分散勢亦難全若奔諸部必不我容吾將為呼
韓邪之計矣乃詣統降於堅堅悅署為南單于留之長
安以司繁叔父吐雷為勇士護軍撫其部眾俄而鮮卑
勃寒侵斥隴右堅以司繁為使持節都督討西胡諸軍

事鎮西將軍以討之勃寒懼而請降司繁遂鎮勇士川

甚有威惠司繁卒國仁代鎮孝武太元十年自稱大都

督大將軍大單于領秦涼二州牧在位四年弟乾歸嗣

乾歸在位二十四年子熾磐嗣熾磐在位十五年子慕

末嗣慕末在位四年為赫連定所殺

始國仁以孝武太元十年僭位至慕

末凡四世四十有六載而滅

北燕馮跋字文起長樂信都人也小字乞直伐其先畢

萬之後也萬之子孫有食采馮鄉者因以氏焉永嘉之

亂跋祖父和避地上黨父安雄武有器量慕容永時為將軍永滅跋東徙和龍家於長谷跋為慕容雲所署使持節侍中都督中外諸軍事雲為其幸臣所殺跋乃僭稱天王位於昌黎在位二十二年弟弘立六年為後魏所滅

始跋以孝武太元二十年僭立至弘凡二世二十八年

南涼秃髮烏孤西河鮮卑人也其先與後魏同出八世祖匹孤率其部自塞北遷於河西其地東至麥田牽屯西至濕羅南至澆河北接大漠匹孤卒子壽闡立初壽

聞之在孕母胡掖氏因寢而產於被中鮮卑謂被為禿髮因而氏焉壽闡卒孫樹機能立壯果多謀畧晉武帝泰始中殺秦州刺史胡烈於萬斛堆殺涼州刺史蘇愉於金山盡有涼州之地武帝為之旰食後為馬隆所敗部下殺之以降弟務丸立死孫推斤立死子思復鞬立部衆稍盛烏孤即思復鞬之子也安帝隆安元年自稱大都督大將軍大單于西平王在位三年弟利鹿孤立徙居西平利鹿孤在位三年弟儁擅嗣儁擅僭位涼王遷

於樂都在位十三年年五十一為乞伏熾磐所滅

始烏孤以

安帝隆安元年僭立
凡三世十有九年

南燕慕容德字玄明後燕慕容垂之弟垂稱燕王以德為車騎大將軍垂死子寶嗣寶以德為丞相領冀州牧承制南夏晉安帝隆安四年僭即皇帝位在位五年年

七十兄子超嗣超字祖明在位六年為晉所滅

始德以安帝隆

安四年僭立至超
二世凡十一年

北涼沮渠蒙遜臨松盧水胡人也其先世為匈奴左沮

渠遂以官為氏焉。蒙遜仕段業為張掖太守。晉安帝隆安五年，梁中庸等推為使持節大都督大將軍涼州牧。義熙八年，僭立在偽位。三十三年，年六十六，子茂虔立。六年為後魏所擒。

凡二世三十九載

夏赫連勃勃字屈子，匈奴右賢王去卑之後。劉元海之族也。曾祖武劉聰，世以宗室封樓煩公。拜安北將軍監鮮卑諸軍事、丁零中郎將。雄據肆廬川，為代王猗盧所敗，遂出塞。表祖豹子招集種落，復為諸部之雄。石季龍

遣使就拜平北將軍左賢王丁零單于父衛辰入居塞
內符堅以為西單于督攝河西諸虜屯於代來城及堅
國亂遂有朔方之地控弦之士三萬八千後魏師伐之
辰令其子力侯提拒戰為魏所敗魏人乘勝濟河尅代
來執辰殺之勃勃乃奔於叱干部晉安帝義熙三年僭
稱天王大單于自以匈奴夏后氏之苗裔也國稱大夏
又下書曰朕之皇祖自北遷幽朔姓改如氏音殊中國
故從母氏為劉子而從母之姓非禮也古人氏族無常

或以因生為氏或以王父之名朕將以義易之帝王者
係天為子是為徽赫實與天連今改姓曰赫連氏庶協
皇天之意永保無疆大慶係天之尊不可令支庶同之
其非正統皆以鐵伐為氏庶朕宗族子孫剛銳如鐵皆
堪伐人勃勃在位十三年子昌嗣偽位尋為後魏所擒
弟定僭號於平涼遂為魏所滅

自勃勃至定凡二十有六載

閩王審知字信通光州固始人父恁世為農民唐僖宗
廣明中黃巢犯闕江淮盜賊蜂起有賊帥王緒者自稱

將軍臨固始縣審知凡潮時為縣佐緒署為軍正蔡賊秦宗權以緒為光州刺史尋遣兵攻緒緒率衆渡江所在剽掠自南康轉至閩中入臨汀自稱刺史緒多疑忌為部將所殺唐僖宗光啟二年福建觀察使陳巖表潮為泉州刺史昭宗大順中巖卒子壻范暉自稱留後潮遣審知將兵攻之斬暉而降繇是盡有閩嶺五州之地潮即表其事昭宗因建威武軍於福州以潮為節度福建管內觀察使命審知為副乾寧中潮卒審知遂繼兄

位封琅邪郡王梁開平中封閩王後唐同光元年審知
卒子延翰嗣為弟延均所殺延均自稱帝國號大閩末
帝清泰二年遇弒子昶嗣昶遇弒審知少子延羲嗣延
羲遇弒兄延政自稱帝於建州晉開運三年為李景所
滅始王氏以唐光啟丙午歲據有閩越凡二世七主通六十年

前蜀王建字光圖陳州項城人也父慶里之豪右唐僖
宗光啟元年入蜀郡為壁州刺史率兵攻臨閬利二州
又攻臨成都昭宗龍紀元年授西川節度副大使知節

度事梁太祖開平二年建自帝於成都國稱大蜀在位十二年年七十二子衍嗣衍字化源在位七年年二十

五為後唐所滅

建自唐光啟初入蜀父子相承凡四十年

吳楊行密廬州人唐僖宗光啟初秦宗權擾淮右郡將募能致戰擒賊者行密應募補為隊長因殺都將自權州兵朝廷因正授廬州刺史大順二年畧有淮南之地乾寧二年授淮南節度副大使知節度事封弘農郡王哀帝天祐三年卒子渥襲其位自稱吳王在位三年為

大將張顥所殺別將徐溫殺顥立渥弟渭凡十餘年溫

乃冊渭為天子國號大吳渭僭號三年而卒溫乃推行

密幼子溥為主晉天福二年溥遜位溫養子李昇

自唐大順

二年至晉天福二年凡四十七年

前漢劉陟其先彭城人祖安仁仕唐為潮州長史因家

嶺表父謙為廣州牙將以軍功拜封州刺史領賀水鎮

使謙卒子隱復領賀水鎮兼封州刺史唐末嶺南節度

使徐彥若薨表隱為兩使留後梁太祖為梁王時表隱

為嶺南節度使開平初累封南海王四年卒陟隱之弟也代據其位梁末帝貞明二年僭號於廣州國號大漢

後改曰龔

龔讀為儼古文無此字蓋妄撰也

晉高祖天福七年卒年五

十四長子玠嗣玠在位一年陟第二子晟殺玠自立晟

周顯德五年卒長子鋹嗣皇朝開寶三年為王師所滅

始陟自梁貞明三年僭號歷三世四主凡五十五年

後蜀孟知祥字保裔邢州龍岡人也祖察父道世為郡校伯父方立終於邢雒節度使從父遷位至澤潞節度

使知祥後唐莊宗同光三年授西川節度副大使知節

度事愍帝應順元年正月稱帝於蜀七月卒年六十一

其子昶襲偽位皇朝乾德三年為王師所平

知祥自後唐同光三

年入蜀父子相承凡四十年

後唐李昇本海州人偽吳大丞相徐溫之養子也溫字敦美亦海州人初從淮南節度使楊行密起兵於廬州漸至軍校唐末青州王師範為梁祖所攻乞師於淮南楊行密發兵赴之溫時為小將亦預行其師次青之南

鄙師範已敗淮兵大掠而還昇時幼穉為溫所虜溫愛其慧黠遂育為己子名曰知誥溫仕吳至大丞相都督中外諸軍事諸道都統封東海王溫卒昇為中書令累封齊王晉高祖天福二年楊溥遜位於昇國號大齊昇自云唐玄宗第六子永王璘之裔天寶末安祿山連陷兩京玄宗幸蜀詔璘為山南嶺南黔中江南四道節度採訪等使璘至廣陵大募兵甲有窺圖江右之志後為官軍所敗死於大庾嶺北故昇指以為遠祖因還姓李

氏始改名曰昇國號大唐昇僭位七年卒長子景嗣位
皇朝建隆二年卒子煜襲偽位開寶八年為王師所平

始昇以晉天福二年僭
位凡三世三十九年

後漢劉崇太原人漢高之從弟也乾祐初為北京留守
周太祖廣順元年崇僭號於河東稱漢改名昺世宗顯
德二年卒子承均襲偽位承均卒子繼元嗣皇朝太平
興國四年為王師所平

年號

自晉氏失馭中原之主瞻烏逐鹿亂靡有定跡是北人乘釁為天下倡屬而和之者十有六焉洎土運凌遲五代喪亂跨州連郡僭竊相高咸建號紀年以備制度前代策書悉載其事今之論次所以明其叛渙之迹為將來之戒耳

前涼張軌晉永寧元年為涼州刺史都姑臧惠帝封西平公自軌至耀靈六世稱晉建興年號至四十二年張祚僭即帝位始改元和平祚為張瓘所殺立軌子玄靚

張玄靚自號涼州牧西平公復稱建興四十三年至四十九年始改元升平三年為張天錫所殺

張天錫自號涼州牧西平公請命於晉在偽位十三年

為苻堅所滅

本傳無年號

西涼李暠字玄盛

唐以暠為祖故載紀稱字

晉安帝隆安四年晉昌

太守唐瑤推玄盛為大都督涼公領秦涼二州牧玄盛乃赦其境內建元為唐子義熙元年改為建初在位十

八年

唐子五年建初十三年

子歆嗣

李歆字士業嗣位涼公領涼州牧改元嘉興在位四年
為沮渠蒙遜所滅歆弟恂為燉煌郡人所立本傳無年

號

按帝王真偽記
年號永建二年

前趙劉淵字元海

唐高祖淵故
載紀稱其字

晉惠帝永興元年僭即

漢王位於左國城南郊赦其境內年號元熙永嘉二年

僭即皇帝位於蒲改元永鳳是年遷都平陽汾水中得

玉璽文曰有新保之蓋王莽時璽也得者因增泉海光

三字元海以為巳瑞大赦境內改元河瑞元海在位六年

永嘉四年
元海死
子和嗣偽位為弟聰所殺無年號

劉聰僭即皇帝位大赦境內改元光興二年劉曜陷維
陽遷晉懷帝及惠帝羊后傳國六璽於平陽聰大赦改

元嘉平三年以太廟新成大赦境內改元建元三年改

元麟嘉聰在位九年
永興元年聰死
子粲嗣

劉粲既嗣偽位大赦境內改元漢昌在位一月為偽大
將軍錄尚書事靳準所殺準自號漢大王稱藩於晉

劉曜元海之族子以偽相國都督中外諸軍事鎮長安

靳準既殺劉粲曜自長安赴之至於赤壁偽太尉范隆
等上尊號僭即皇帝位晉太興元年大赦境內惟準一門不
在赦限改元光初曜在位十年而敗

後趙石勒晉大興二年偽稱趙王依春秋列國漢初侯
王每世稱元改稱趙王元年至十一年改元太和三年
僭即皇帝位大赦境內改元建平在位十五年太子弘
嗣

石弘既嗣位改元延熙

晉咸和七年

二年石勒從子季龍幽

之逼禪於季龍石虎字季龍

唐太祖諱虎故載記稱字

以晉咸康元

年廢石弘羣臣勸稱尊號季龍下書曰朕聞道合乾坤者稱皇德協人神者稱帝皇帝之號非所敢聞但可稱居攝趙天王以副天人之望於是赦其境內改元建武至十四年僭即皇帝位於南郊大赦境內建元曰大寧明年季龍死凡在位一十五年子世嗣

晉永和六年

石世在

偽位三十三日為兄遵所殺無年號

石遵在偽位一百八十三日為弟鑒所殺無年號

石鑒在偽位一百三日為季龍養孫冉閔所殺年號青龍

石祗聞鑒死僭尊號於襄國為冉閔所滅無年號

冉閔殺石鑒自立改國號大魏建元曰永興復姓冉氏
明年為慕容雋所滅

前燕慕容雋晉永和五年僭即燕王位依春秋列國故事稱元年二年雋既尅冉閔蔣幹以傳國璽送於建鄴雋欲神其事業言歷運在己乃詐云閔妻得之以獻賜

號曰奉璽君因以永和八年僭即皇帝位大赦境內建
元曰元璽其後雋太子暕死復立次子暕為皇太子赦
其境內改元曰光壽在位十一年

元璽五年
光壽六年

雋死子暕

嗣

慕容暕晉升平四年僭即皇帝位大赦境內改元曰建
熙暕在位十一年以晉太和五年為符堅所滅

前秦苻健晉永和七年僭稱天王大單于赦境內死罪
建元皇始明年健僭皇帝位於太極殿在位四年子生

嗣

苻生僭皇帝位大赦境內改元壽光時晉永和十二年也在位二年為從弟堅所殺

苻堅晉升平元年僭稱大秦天王赦其境內改元曰永興後南遊霸陵大赦改元為甘露又改元為建元在位

三十年

永興三年甘露六年建元二十一年

晉太元十年為姚萇所殺

苻丕堅之長庶子也堅死丕僭即皇帝位於晉陽南立

堅行廟大赦境內改元曰太安明年為慕容永所殺

晉太

元十
一年

苻登堅之族子丕死尚書寇遺等推立登僭即皇帝位

大赦境內改元曰太初在位九年為姚興所殺

太元十年

苻崇登之子登敗奔於湟中僭稱尊號改元延初為乞

伏乾歸所殺

後秦姚萇晉太元九年自稱大將軍大單于萬年秦王

年號白雀稱制行事十一年僭即皇帝位於長安大赦

改元建初國號大秦在位八年

白雀二年
建初六年

萇死太子興

嗣

姚興僭即帝位於槐里大赦境內改元曰皇初遂如安
定其後以日月薄蝕降號稱王大赦改元弘始在位二

十二年

皇初四年弘始十八年

晉義熙十一年死子泓嗣

姚泓僭即皇帝位改元永和在位二年為晉所滅

晉義熙十

三年也

後蜀李特晉太安元年自稱益州牧都督梁益二州諸
軍事大將軍大都督改元建初赦其境內明年特死弟

流嗣

李流無年號

李雄特第二子流死雄自稱大都督大將軍益州牧晉永興元年僭稱成都王赦其境內建元為建興丞相范長生勸雄稱尊號雄於是僭即帝位赦其境內改元大

武

按帝王真偽記云晏平

又改玉衡雄在位三十年

建興二年大武四年玉衡

二十四年太子班嗣

李班嗣偽位為弟越所殺無年號

李期雄第四子越既殺班以期雄妻任氏所養乃讓位
於期僭即帝位大赦境內改元玉恒期在位三年

李壽晉咸康四年僭即偽位赦其境內改元為漢興壽
在位五年子勢嗣

李勢嗣偽位赦其境內改元曰太和其後偽太保李奕
自晉壽舉兵反勢誅奕大赦境內改元嘉寧勢在位五

年

太和三年
嘉寧二年

為晉所滅

後涼呂光初為符堅安西將軍既入姑臧自領涼州刺

史晉太元十年堅死十二年光大赦境內建元曰太安自稱涼州牧酒泉公是時麟見金澤縣百獸從之光以為己瑞以晉武太元十五年僭即三河王位置百官自丞郎已下赦其境內年號麟嘉太元二十一年僭即天王位改元龍飛在位十年麟嘉七年龍飛三年太安不預因疾甚立太子紹為天王自號太上皇帝

呂紹嗣偽位數月為庶兄纂所殺無年號

呂纂晉隆安四年僭即天王位改元為咸寧在位三年

為番禾太守呂超所殺

呂隆光弟寶之子與呂超同殺纂隆既僭即位超先於番禾得小鼎以為神瑞大赦改元為神鼎在位四年為姚興所滅

後燕慕容垂初為符堅將晉太元八年自稱燕王建元曰燕元十一年僭即帝位改元建興至二十一年垂死子寶嗣

慕容寶嗣偽位改元永康在位三年為蘭汗所殺

晉隆安三

也年

慕容盛寶之庶長子誅蘭汗僭即偽位改元長樂在位

三年為段璣所殺

隆安五年也

叔父熙嗣

慕容熙垂之少子嗣立誅段璣等赦殊死已下改元曰
光始在位六年為垂養子雲所殺

慕容雲即天王位復姓高氏大赦境內殊死已下改元
正始國號大燕為幸臣離班姚仁等所殺

西秦乞伏國仁初為苻堅秦川牧以晉孝武太元十年

自稱大都督大將軍大單于領秦河二州牧改元曰建

義明年符登遣使署國仁苑川王在位四年弟乾歸立

乞伏乾歸自為大單于河東王赦其境內改元曰太初

晉義熙三年僭稱秦王赦其境內改元曰更始在位二

十四年

太初二十年
建始四年

子熾磐嗣

乞伏熾磐襲偽位大赦改元曰永康

晉義熙
六年也

晉元熙元年熾磐立其第二子慕末為太子領撫軍大

將軍都督中外諸軍事大赦境內改元曰建弘熾磐在

位十五年

乞伏慕末嗣偽位三年為赫連定所殺

本傳無年號

北燕馮跋初為高雲征北大將軍錄尚書事雲為其幸
臣離班姚仁所殺跋帳下督張泰李桑斬班仁推跋為
主晉太元二十年乃僭稱天王於昌黎赦其境內建元

曰天平在位二十三年

宋元嘉七年跋死

馮弘跋之弟跋死弘殺其子翼自立後為魏所伐奔高
句麗在位六年偽號大興

南涼禿髮烏孤初為呂光將晉安帝隆安元年自稱大都督大將軍大單于西平王赦其境內年號太初在位三年弟利鹿孤立

禿髮利鹿孤晉隆安三年立既逾年赦其境內改元曰建和在位三年弟儁擅嗣

禿髮儁擅以晉元興元年僭號涼王遷於樂都改元弘昌又改嘉平在位十三年

宏昌六年
嘉平七年

為乞伏熾磐所滅

南燕慕容德垂之弟垂臨終勅其子寶以鄴城委德寶

既嗣位以德為丞相冀州牧承制南夏晉隆安二年自鄴徙於滑臺明年寶為蘭汗所殺德依燕元故事稱元年赦殊死已下置百官四年僭即皇帝位於南郊大赦改元為建平在位五年兄子超嗣位

慕容超即位改元曰太上在位六年為晉所滅

北涼沮渠蒙遜等初推段業為涼州牧建康公改呂光龍飛二年為神璽元年業後僭稱涼王蒙遜殺之晉安帝隆安五年蒙遜僭稱涼州牧張掖公赦其境內改元

永安義熙八年僭即河西王位大赦境內改元玄始置

官寮如呂光為三河王故事在偽位三十三年

永安十二年玄

始十六年承玄三年義和三年記不書承玄義和二年號按帝王真偽記編入

子茂乾嗣

沮渠茂乾在偽位七年年號承和為後魏所滅

夏赫連勃勃初為姚興安北將軍五原公晉義熙二年

僭稱天王大單于建元曰隆昇署置百官自以匈奴氏

之苗裔也國稱大夏其後改元為鳳翔勃勃既入長安

為壇於灞上僭即皇帝位赦其境內改元為昌武自長

安還統萬以宮殿大成於是赦其境內又改元曰真興

勃勃在位十八年

龍昇六年鳳翔五年
昌武元年真興七年

子昌嗣

赫連昌嗣偽位年號永光四年為魏所擒弟定立
赫連定僭偽位於平涼年號服光四年為魏所滅

吳楊渭淮南節度使弘農郡王行密次子行密唐天祐
三年卒長子渥繼襲是歲梁太祖既受唐禪改元開平
而渥猶稱天祐至五年渥為大將張顥所殺顥自稱留
後將納款於梁又為別將徐溫所殺以渭為主至十六

年溫冊渭為天子改元武義

盡二年

楊溥渭之弟渭卒溥嗣偽位改元順義

盡七年

又改乾貞

盡二年

又改太和

盡二年

又改天祚

盡二年

遜位於李昇

前蜀王建梁開平三年以劔東南西川節度使蜀王僭
即皇帝位於成都改元武成三年改元永平五年改元
通正是年冬改元天漢又改元光天

王衍建之幼子嗣偽位改元乾德六年十二月改明年
為咸康

漢劉陟青海靜海兩軍節度使南海王隱之弟隱以梁開平四年卒陟代據其位貞明三年僭號於廣州國號大漢改元乾亨九年白龍見於南海改元白龍四年改元大有凡僭號三十六年

劉玠陟長子陟卒玠嗣偽位改元光天在位一年為弟晟所殺

劉晟即偽位改元應乾又改元乾和

劉鉞晟之長子襲偽位改元太寶

閩王延均福建節度使閩王審知次子審知卒長子延翰嗣為延均所殺延均襲位後唐長興三年上言吳越國王錢鏐薨乞封為吳越王不報遂自稱皇帝國號大閩改元龍啓在位十一年

王昶延均之子嗣偽位改元通文

王延義審知之少子嗣偽位改元永隆在位六年

後蜀孟知祥後唐應順六年以劔東南西川節度使蜀王稱帝於蜀改元明德在位一年

孟昶知祥第三子嗣偽位猶稱明德至四年冬改明年

為廣政

盡二十八
年歸皇朝

唐李昇晉天福二年以偽吳太尉錄尚書事封齊王受吳
禪僭即尊位國號大齊改元昇元建都於金陵尋改國
為唐在位七年

李景昇之長子嗣偽位改元保大周世宗南伐遂稱唐
國主行顯德年號

後漢劉崇周廣順元年以河東節度使僭號於太原稱

漢改名旻仍以乾祐為年號崇卒子均襲偽位

本紀不
書年號

冊府元龜卷二百十九

欽定四庫全書

冊府元龜卷二百二十 宋 王欽若等 撰

僭偽部

形貌

聰識

令德

才藝

形貌

夫人之生也鍾五行之秀肖二儀之形所稟雖同厥貌則異乃有偶晉室之衰圯幸中原之倨擾保聚羣黨僭竊位號雖邪謀凶德有亂於天常而竒姿偉狀或同於

人傑斯所以資彼姦雄之氣成其悖戾之咎耳故仲尼有言曰以貌取人失之子羽是知取人之道不在乎形貌也明矣

前涼張軌字士彥有器望姿儀

前趙劉淵字元海左手文有其名猿臂善射膂力過人姿儀魁偉身長八尺四寸鬚長三尺餘當心有赤毫毛三根長三尺六寸

劉和字玄泰元海子身長八尺

劉聰字玄明形體非常左耳有一白毫毛長二尺餘甚
光澤

劉曜字永明身長九尺三寸垂手過膝生而眉白目有
赤光鬚髯不過百餘根而皆長五尺弱冠游於雒陽坐
事當誅亡匿朝鮮遇赦而歸自以形質異衆恐不容於
世乃隱迹管涔山

後趙石勒字世龍初名匄上黨武鄉羯人長而壯健父
老及相者皆曰此胡狀貌奇異志度非常其終不可量

也勸邑人厚遇之而賣與在平人師權為奴有一老父謂勒曰君魚龍髮際上四道已成當貴為人主權亦奇其狀貌而免之

石虎字季龍年六七歲有善相者曰此兒貌奇有壯骨貴不可言年十八身長七尺五寸

冉閔字永曾身長八尺勇力絕人

前燕慕容廆字奕維瓌幼而魁岸美姿貌身長八尺雄傑有大度

慕容皝字元真龍顏版齒身長七尺八寸

慕容雋字宣英骨相不常身長八尺二寸姿貌魁偉

前秦苻生字長生生無一目為兒童時祖洪戲之問侍者曰吾聞瞎兒一淚信乎侍者曰然生怒引佩刀自刺出血曰此亦一淚也洪大驚鞭之

苻堅字永固臂垂過膝目有紫光祖洪愛之名曰堅頭每曰此兒姿貌魁偉質性過人非常相也

後秦姚襄字景國年十七身長八尺五寸臂垂過膝

後蜀李特字玄休身長八尺雄武善騎射沉毅有大度
李雄字仲雋身長八尺三寸美容貌少以烈氣聞每周
旋鄉里識達之士皆器重之

李勢字子仁身長七尺九寸腰帶十四圍善於俯仰時
人異之

後涼呂光字世期身長八尺四寸目重瞳子左肘有肉
印

呂隆字永基美姿貌善騎射

南燕慕容垂字道明少岐嶷有器度身長七尺四寸手垂過膝

慕容德字玄明年未弱冠身長八尺二寸姿貌雄偉額有日角偃月重文

慕容超字祖明身長八尺腰帶九圍精彩秀發容止可觀

夏赫連勃勃字屈子身長八尺五寸腰帶十圍性辯慧美風儀姚興見而竒之深加禮敬宋高祖入長安遣使

遺勅勅書請通和好使者還言勅勅容儀瓌偉英武絕人高祖歎曰吾所不如也

蜀王建字光圖隆眉廣顙龍睛虎視常於武當山遇僧處嘗謂建曰子骨相甚貴何不從軍自求豹變而乃區區為盜綴賊之號

閩王審知身長七尺六寸紫色方口隆準

聰識

夫鍾五行之秀為萬物之靈者其人矣乎自晉室板蕩

羣雄肇亂竊據郡國僭稱位號者比比而有雖復乘夫
否運內包逆節亦有性識穎悟器局闊遠稽古好學摛
文屬辭或留神於政治或騁辨於談議或折節自勛或
發言垂戒至於揣摩事幾必有於先見褒貶前哲差出
於衆意斯亦豪爽自負超越倫萃者哉

前涼張駿幼而奇偉晉愍帝建興四年封霸城侯十歲
能屬文卓越不羈及嗣位勤脩庶政摠御文武咸得其
用遠近嘉詠號曰積賢君

前趙劉元海嘗謂同門生朱紀范隆曰吾每觀書傳常鄙隋陸無武絳灌無文道繇人弘一物之不知者固君子之所耻也二生遇高皇而不能建封侯之業兩公值文帝而不能開庠序之美惜哉於是遂學武事妙絕於衆

劉曜幼而聰慧有竒度年八歲從父元海獵於西山遇雨止樹下迅雷震樹旁人莫不顛仆曜神色自若元海異之曰此吾家千里駒也從兄為不亡矣

後趙石勒雅好學雖在軍旅嘗令儒生讀史書而聽之
每以其意論古帝王善惡朝賢儒士聽者莫不歸美焉
嘗使人讀漢書聞酈食其勸立六國後大驚曰此法當
失何得遂成天下至留侯諫乃曰賴有此耳其天姿英
達如此

前秦苻堅七歲聰敏好施舉止不踰規矩每侍其祖父
洪側輒量洪舉措取與不失機候高平徐統遇堅於路
異之執其手曰符郎此官之御街小兒敢戲於此不畏

司隸縛耶堅曰司隸縛罪人不縛小兒戲也及即偽位
出遊霸陵顧謂羣臣曰漢祖起自布衣廓平四海佐命
功臣孰為首乎權翼進曰漢書以蕭曹為功臣之冠堅
曰漢祖與項羽爭天下困於京索之間身被七十餘創
通中六七父母妻子為楚所囚平城之下七日不火食
賴陳平之謀太上妻子克全免匈奴禍二相不得獨高
也雖有人狗之喻豈黃中之言乎於是酣飲極歡命羣
臣賦詩又時匈奴左賢王衛辰遣使降於堅遂請田內

地堅許之雲朔護軍賈雍遣其司馬徐斌率騎襲之因縱兵掠奪堅怒曰朕方脩魏絳和戎之術不可以小利忘大信昔荆吳之戰事興蠶婦澆瓜之惠梁宋息兵夫怨不在大事不在小擾邊動衆非國之利也所獲資產其悉以歸之免雍官以白衣領護軍遣使脩和示之信義辰於是入居塞內貢獻相尋又遣苻雄等伐代王涉翼捷其子翼圭縛父請降堅曰翼捷荒俗未叅仁義令入太學習禮以翼圭執父不孝遷之於蜀散其部落堅

嘗之太學召涉翼捷問曰中國以學養性而人壽考漠北噉牛羊而人不壽何也翼捷不能答又問卿種人有堪將者可召為國家用對曰漠北人能捕六畜善馳走逐水草而已何堪為將又問好學否對曰若不好學陛下用教何為堅善其對又聞桓溫廢海西公也謂羣臣曰溫前敗海上後敗枋頭十五年間再傾國師六十歲翁舉動如此不能思愆免退以謝百姓方廢立以自悅將如四海何諺云怒其室而作色於父者其桓溫之謂乎

又梁熙遣使西域稱揚堅之威德并以繒綵賜諸國王於是朝獻者十有餘國大宛獻天馬千里駒皆汗血朱鬣五色鳳膺麟身及諸珍異五百餘種堅曰吾思漢文之返千里馬咨嗟美詠今所獻馬其悉返之庶克念前王髣髴古人矣乃命羣臣作止馬詩而遣之示無欲也其下以為盛德之事遠同漢文於是獻詩者四百餘人符登初為長安令坐事黜為狄道長及關中亂去縣歸毛興登兄同成言於興請以登為司馬嘗在行部登度

量不羣好為竒畧同成嘗謂之曰汝聞不在其位不謀其政無數干時將為博識者不許吾非疾汝恐或不喜人妄預耳自是可止汝後得政自可專意時人間同成言多以為疾登而抑蔽之登乃屏跡不妄交游興有事則召之戲謂之曰小司馬可坐評事登出言輒析理中興內服焉然敬憚而不能委任

前燕慕容廆嘗從容言曰獄者人命之所懸也不可以不慎賢人君子國家之基也不可以不敬稼穡者國之

本也不可以不急酒色便佞亂德之賊也不可以不戒
乃著家令數千言以申其旨

後秦姚興既僭位晉大司馬桓玄遣使來聘請辛恭靖
何澹之興留恭靖而遣澹之謂曰桓玄不推計歷運將
圖篡逆天未忘晉必將有義舉以吾觀之終當傾覆卿
今馳往必逢其敗相見之期遲不云遠未幾桓玄誅澹
之等奔於興

後涼呂光年十歲與諸童兒遊戲邑里為戰陣之法儔

類咸推為主部分詳平羣童歎服

後燕慕容盛少沈敏多謀畧符堅誅慕容氏盛年十二
隨慕容永東如長子謂叔父柔曰今崎嶇於鋒刃之間
在疑忌之際愚則為人所猜智則危甚巢幕當如鴻鵠
高飛一舉萬里不可坐待罟網也於是與柔及弟會間
行東歸於慕容垂後遼西太守李郎在郡十年威制境
內盛疑之累徵不赴以母在龍城未敢顯叛乃陰引魏
軍將為自安之計因表請發兵以距寇盛曰此必詐也

召其使而詰之果驗又嘗引中書令常忠尚書陽璆秘書監郎敷於東堂問曰古來君子皆謂周公忠聖豈不謬哉璆曰周公居攝政之重而能達君臣之名及流言之謗致烈風以悟主道契神靈義光萬代故累葉稱其高後王無以奪其美盛曰常令以為何如忠曰昔武王疾篤周公有請命之誠流言之際義感天地楚撻伯禽以訓就王德周公為臣之忠聖達之美詩書以來未之有也盛曰異哉二君之言朕見周公之詐未見其忠聖

也昔武王得九齡之夢白文王文王曰我百爾九十我與爾三焉及文王之終已驗武王之壽矣武王之筭未盡而求代其死是非詐乎若惑於天命是不聖也據攝天位而丹誠不見致兄弟之間有干戈之事夫文王之化自近及遠故曰刑于寡妻至於兄弟周公親違聖父之典而蹈嫌疑之蹤戮罰同氣以逞私忿何忠之有乎但時無直筆之史後儒承其謬談故也忠曰故金滕而返風亦足以明其不詐遭二叔流言之變而能大義滅

親終安宗國復子明辟輔成大業以致太平制禮作樂
流慶無窮亦不可謂非至德也盛曰卿徒因成文而未
原大理朕今相為論之昔周公自后稷積德累仁至於
文武文武以大聖應期遂有天下生靈仰其德四海歸
其仁成王雖幼統洪業而卜世脩長加呂召毛畢為之
師傅若無周公攝政王道足以成也周公無故以安危
為己任專臨朝之權闕北面之禮管蔡忠存王室以為
周公代主非人臣之道故言公將不利於孺子周公當

明大順之節陳誠義以曉羣疑而乃阻兵都邑擅行誅戮不臣之罪彰於海內方貽王鷓鴣之詩歸非於主是何謂乎又周公舉事稱告二公足明周公之無罪而坐觀成王之疑此則二公之心亦有猜於周公也但以踈不間親故寄言於管蔡可謂忠不見於當時仁不及於兄弟知羣望之有歸天命之不在已然後返政成王以為忠耳大風拔木之徵乃皇天祐存周道不忘文武之德是以赦周公之始愆欲成周室之大美考周公之心

原周公之行乃天下之罪人何至德之謂也周公復位
二公所以杜口不言其本心者以明管蔡之忠也又謂
常忠曰伊尹周公孰賢忠曰伊尹非有周公之親而功
濟一代太甲亂德放於桐宮思愆改善然後復之使主
無怨言臣無流謗道存社稷美溢來今臣謂伊尹之勲
有高周旦盛曰伊尹以舊臣之重顯阿衡之任太甲嗣
位君道未洽不能竭忠輔導而放黜桐宮事同夷羿何
周公之可擬乎郎敷曰伊尹處人臣之位不能輔制其

君恐成湯之道墜而莫就是以居之桐宮與小人從事使知稼穡之艱難然後返天位此其忠也盛曰伊尹能廢而立之何不能輔之以至於善乎若太甲性同桀紂則三載之間未應便成賢后如其性本休明義心易發當務盡規贊之理以弼成君德安有人臣幽主而據其位哉且臣之事君惟力是視奈何挾智藏仁以成君惡夫太甲之事朕已鑒之矣太甲至賢之主也以伊尹歷奉三朝績無異稱將失顯祖委授之功故匿其日月之

明受伊尹之黜所以濟其忠貞之美夫非常之人然後能立非常之事非常人之所見也亦猶泰伯之三讓人無得而稱焉敷曰泰伯三以天下讓至仲尼而後顯其至德太甲受謗於天下遭陛下乃申其美因而談讌賦詩賜金帛各有差

南涼禿髮傉檀利鹿孤之弟初姚興遣使拜車騎將軍傉檀少機警有才畧其父竒之謂諸子曰傉檀明識幹藝非汝等輩也是以諸兄不以授子欲傳之於傉檀後

為赫連勃勃所敗姚興以僭擅外有陽武之敗內有邊
梁之亂遣其尚書郎韋宗來觀釁僭擅與宗論六國縱
橫之規三家戰爭之畧遠言天命廢興近陳人事成敗
機變無窮辭致清辨宗出而歎曰命世大才經綸名教
者不必華宗夏士撥煩理亂澄氛濟世者亦未必八索
九丘五經之外冠冕之表復自有人車騎神機秀發信
一代之偉人繇余日碑豈足為多也

令德

六軍起纛五馬渡江先王維桑分割有素中州舊物吞
噬無餘二趙四燕蝟毛而起三秦五涼蠶食以生李特
王蜀赫連稱夏竊帝圖王時聞令德連衡共誓各負英
獻書云萬夫之長可以觀政矧據有土宇僭稱名器宜
欲有拳拳之善以服蚩蚩之心

前涼張重華自稱涼州牧輕賦斂除關稅省園囿以恤
貧窮

張天錫數宴園池政事頗廢盪難將軍校書祭酒索商

上疏極諫天錫答曰吾非好行行有得也觀朝榮則敬才秀之士翫芝蘭則愛德行之臣觀松竹則思貞操之賢臨清流則貴廉潔之行覽蔓草則賤貪穢之吏逢颶風則惡凶狡之徒若引而伸之觸類而長之庶無遺漏矣

西涼李暠字玄盛少而好學性沈敏寬和美器度暠既遷於酒泉沮渠蒙遜每年侵寇不止玄盛志在以德撫其境內但與通和立盟弗之較也又與辛景辛恭靖同

志友善景等歸晉遇害江南玄盛聞而弔之

前趙劉曜嘗燕羣臣於東堂語及平生泣然流涕遂下書曰蓋褒德惟舊聖后之所先念惠錄孤明王之常典是以世祖草創河北而致封於嚴尤之孫魏武勒兵梁宋追慟於橋公之墓前所贈大司徒烈愍公崔岳中書令曹恂晉陽太守王忠太子洗馬劉綏等或識朕於齟齬之中或濟朕於艱窘之極言念君子實傷我心詩不云乎中心藏之何日忘之岳漢昌之初雖有褒贈屬否

運之際禮章莫備今可贈岳使持節侍中大司徒遼東
公恂大司空南郡公綏左光祿大夫平昌公忠鎮軍將
軍安平侯並加散騎常侍但皆丘墓夷滅申哀莫繇有
司其速班訪岳等子孫授以茅土稱朕意焉初曜弱冠
遊於雒陽坐事當誅與曹恂奔於劉綏綏匿之於書匱
載送於王忠忠送之朝鮮歲餘饑窘變姓名客為縣卒
岳為朝鮮令見而異之推問所繇曜叩頭自首流涕求
哀岳曰卿謂崔元嵩不如孫賓碩乎何懼之甚也今詔

捕卿甚峻百姓間不可保也此縣幽僻勢能相濟縱有大急不過解印綬與卿俱去耳吾既門衰無兄弟之累身又薄祐未有兒子卿猶吾子弟也勿為過憂大丈夫處身立世鳥獸投人要欲濟之而况君子乎給以衣服資供書傳曜遂從岳質通疑滯恩顧甚厚岳從容謂曜曰劉生姿宇神調命世之才也四海脫有微風搖之者英雄之魁卿其人矣曹恂雖於屯厄之中事曜有君臣之禮故皆德之

後趙石勒大興三年偽稱趙王下令曰武鄉吾之豐沛
萬歲之後魂靈當歸之其復之三世又少時遇危難賴
郭敬而濟後勒攻乞活李暉於上白斬之將坑其降卒
見郭敬而識之曰汝郭季子乎敬叩頭曰是也勒下馬
執其手泣曰今日相遇豈非天耶賜衣服車馬署敬上
將軍悉免降者以配之又時大旱勒親臨廷尉錄囚徒
五歲刑以下皆輕決遣之重者賜酒食聽沐浴一須秋
論還未及宮澍雨大降

石季龍時冀州八郡大蝗司隸請坐守宰季龍曰此政之失和朕之不德而欲委咎於守宰豈禹湯罪已之義耶司隸不進讜言佐朕不逮而歸咎無辜所以重吾之責可白衣領司隸

前秦苻堅既平慕容暉自鄴如枋頭讌諸父老改枋頭為永昌縣復之終世又遣驍騎呂光率兵七萬討定西域光發長安堅送於建章官謂光曰西戎荒俗非禮義之邦羈縻之道服而赦之示以中國之威導以王化之法

勿極武窮兵過深殘掠又所司奏劉蘭討蝗幽州經秋冬不減請徵下廷尉詔獄堅曰災降自天殆非人力所能除也此自朕之政違所致蘭何罪焉

後秦姚萇僭即偽位後大雪下書深自責罰散後宮文綺珍寶以供戎事身食一味妻不重采立太學禮先賢之後敗符登於安定東置酒高會諸將咸曰若值魏武王不令此賊至今陛下將牢太過耳萇笑曰吾不如亡兄有四身長八尺五寸臂垂過膝人望而畏之一也當

十萬之衆與天下爭衡望麾而進前無橫陣二也溫古
知今講論道藝駕馭英雄收羅雋異三也董率大衆履
險若夷上下咸允人盡死力四也所以得建功立業策
任羣賢者正望筭畧中一片耳羣臣咸稱萬歲

姚興時西秦乞伏乾歸為其所殺子熾磐新立羣
下咸勸興取之興曰乾歸先已返善吾方當招懷因喪
伐之非朕本志也興性儉約車馬無金玉之飾臣下化
之莫不敦尚清素又客星入東井所在地震前後一百

五十六公卿抗表請罪興曰災譴之來咎在元首近代或歸罪三公甚無謂也公等其悉冠履復位後興以日月薄蝕災眚屢見降號稱王下書令羣公卿士將牧守宰各降一等於是其太尉趙公旻等五十三人上疏諫曰伏惟陛下勲格皇天功濟四海威靈振於殊域聲教暨於遐方雖成湯之隆殷基武王之崇周業未足比諭方當廓靖江吳告成中岳豈宜過垂冲損違皇天之眷命乎興曰殷湯夏禹德冠百王然猶順守謙冲未居崇極

况朕寡昧安可以處之哉乃遣旻告於社稷宗廟大赦
改元弘始賜孤老鰥寡粟帛有差年七十已上加衣杖
姚泓字元子既僭即帝位將封官臣十六人五等子男
姚讚諫曰東宮文武自當有守忠之誠未有赫然之効
何受封之多乎泓曰懸爵於朝所以懲勸來効標明盛
德元子遭家不造與功臣同此百憂獨享其福得不愧
於心乎讚默然姚紹進曰陛下不忘報德封之是也古
者敬其事命之以始須來春然後議之乃止時姚懿以

叛被囚姚恢復叛姚紹率輕騎先赴難使姚洽司馬國璠將步卒三萬赴長安恢從曲牢進屯杜成紹與恢相持於靈臺姚讚聞恢漸逼留寧朔尹雅為弘農太守守潼關率諸軍還長安泓謝讚曰元子不能崇明德義導率羣下致禍起蕭牆變生同氣既上負祖宗亦無顏見諸父懿始構逆滅亡恢復擁衆內叛將若之何讚因攘袂大泣曰臣不滅此賊終不持面復見陛下於是班賜軍士而遣之讚大破恢并其二弟殺之泓哭之悲慟葬

以公禮

後蜀李雄僭即帝位巴都嘗告急云有東軍雄曰吾常
慮石勒跋扈侵逼琅邪以為耿耿不圖乃能舉兵使人
欣然雄之雅譚多如此類雄後遣安北李稚中領軍李
瑒討楊難敵難敵遣兵斷其歸道四面攻之獲瑒稚死
者數千人瑒稚雄兄蕩之子也雄深悼之不食者數日
則流涕深自咎責焉

西秦乞伏乾歸遣其將乞伏益州討姜乳於上邽邊芮

王松壽言於乾歸曰益州屢有戰功嘗有驕色未宜專任乾歸卒遣之益州果敗乾歸曰孤違蹇叔以至於此將士何為孤之罪也皆赦之

北燕馮跋幼而懿重少言寬仁有大度飲酒一石不亂三弟皆任俠不修行業惟跋恭慎勤於家產父母器之南涼禿髮傉檀僭號涼王姚興涼州刺史王尚遣主簿宗敞來聘敞父夔呂光時自涅河太守入為尚書郎見傉檀於廣武執其手曰君神爽宏拔逸氣凌雲命世之

傑也必當尅清世難恨吾年老不及見耳以敞兄弟託君至是僂擅謂敞曰孤以常才謬為尊先君所見稱每自恐有累大人冰鏡之明及忝家業竊有懷君子詩云中心藏之何日忘之不圖今日得見卿也敞曰大王仁侔魏祖存念先人雖朱暉眄張堪之孤叔向撫女齊之子無以加也酒酣語及生平僂擅曰卿魯子敬之儔恨不與卿共成大業耳

才藝

夫僭稱名號據有山河長百萬之氓跨數州之域生殺
在手彊弱繇心或學通經史暗會孫吳或藝精騎射兼
該象緯而又飾之以詞翰輔之以度量彊明政事固多
才藝亦可謂人傑矣不然曷以臣伏黨類駕馭羣豪者
乎

前涼張軌少明敏好學有器望

張祚博學雄武有政事之才

西涼李暠少而好學性沉敏寬和美器度通涉經史尤

善文義及長頗習武藝誦孫吳兵法

前趙劉元海幼好學師事上黨崔游習毛詩京氏易馬氏尚書尤好春秋左氏傳孫吳兵法畧皆誦之史漢諸子無不綜覽猿臂善射膂力過人

劉和好學夙成習毛詩左氏春秋鄭氏易

劉聰幼而聰悟好學博士朱紀大奇之年十四究通經史兼綜百家之言孫吳兵法靡不誦之工草隸善屬文著述懷詩百餘篇賦頌五十餘篇十五習擊刺猿臂善

射彎弓三百斤膂力驍捷冠絕一時

劉粲少而雋傑才兼文武

劉曜幼而聰慧有奇度性拓落高亮與衆不羣讀書志於廣覽不精思章句善於屬文工草隸雄武過人鐵厚一寸射而洞之於時號為神射尤好兵書畧皆闇誦弱冠游於洛陽坐事當誅亡匿朝鮮遇赦而歸隱迹管涔山以琴書為事

後趙石勒長而壯健有膽力雄武好騎射

石季龍尤善彈趨捷便弓馬勇冠當時

前燕慕容皝雄毅多權畧尚經學善天文

慕容雋博觀圖書有文武幹畧

慕容恪幼而謹厚深沈有大度雄毅嚴重每所言及輒
經綸世務

前秦苻洪多權畧驍武善騎射

苻健勇果便弓馬

苻生力舉千鈞雄勇好殺手格猛獸走及奔馬擊刺騎

射冠絕一時

符堅博學多才藝有經濟大志

符丕少而聰慧好學博綜經史父堅與言將畧嘉之命
鄧羌教以兵法文武材幹亞於符融

符登少而雄勇有壯氣不修細行長而折節謹厚頗覽
書傳

後秦姚襄雄武多才藝明察善撫納士衆愛敬之

姚泓博學善談論尤好詩詠受經於博士淳于岐

後蜀李特雄武善騎射沉毅有大度

李流少好學便弓馬東羌校尉何攀稱流有資育之
勇舉為東羌督

李期聰慧好學弱冠能屬文

李壽敏而好學雅量豁然少尚禮容異於李氏諸子父
雄竒其才以為足寄重任

後涼呂纂少便弓馬好鷹犬

呂隆善騎射

後燕慕容寶自為太子砥礪自修敦崇儒學工談論善
屬文

慕容盛驍勇剛毅有伯父全之風烈

慕容雲沈深有局量厚重希言慕容寶之為太子雲以
武藝給事侍東宮

西秦乞伏國仁年十歲驍勇善騎射彎弓五百斤四部
服其雄武

乞伏乾歸雄武英傑沉雅有度量

乞伏熾磐性勇果英毅臨機能斷

北涼沮渠蒙遜博涉羣史頗曉天文雄傑有英畧滑稽
善權變

南燕慕容德博觀羣書性清慎多才藝

吳楊行密少孤貧有膂力日行三百里唐末秦宗權擾
淮右頻寇廬壽郡將募能致戰擒賊者計級賞之行密
以膽勇應募往必有獲

蜀王建機畧拳勇出於流輩

後蜀孟知祥自幼溫厚知書樂善



冊府元龜卷二百二十